

蘇 劇 後 灘

第 五 集

蘇州市戲曲研究室編印

蘇 劇 後 灘

第 五 集

蘇州市戏曲研究室編印

1961年7月

說 明

苏剧的前身是：“苏灘”，苏灘原名“对白南詞”，是用南詞这种曲調清唱的戏曲体的曲艺。它发源于苏州，盛行于江浙一帶。大約已有將近三百年的历史，至民国初年才开始有簡陋的化装表演，作为清唱的点缀。解放后才正式以一个新兴的剧种——苏剧，步上舞台。

对白南詞的节目分：“前灘”和“后灘”两大类，前灘大多改編自昆曲，是对白南詞中的正戏；后灘是对白南詞中的玩笑戏，它包含着四种类型的节目。一、改編自昆曲的玩笑戏。二、从民間花鼓戏吸收改編或仿作的对子戏。三、类似对口相声的滑稽段子。四、唱一人一事或一件社会現象的唱詞段子。

为什么称前灘和后灘？說法不一。比較可信的解釋是这样的：“灘”是艺人行話的諧声字，艺人的行話称說、唱为“灘”；前灘，即前唱的意思；后灘，即后唱的意思；其演唱习惯是：八前四后，即前唱八出正戏，后唱四出玩笑戏收場。艺人們把前唱的正戏节目，总称为前灘，后唱的玩笑戏节目，总称为后灘。

从第四集至第七集选印的是：苏剧后灘“卖橄欖”和“馬浪蕩”；“馬浪蕩”又名“馬浪蕩棄行”，是苏剧后灘滑稽說唱类型的节目。它可以說是影响深远，家喻戶曉的了。直到現在，苏州人还称：不务正业，工作不安心，或長期找不到固定职业的人叫：“馬浪蕩”。“馬浪蕩”原来大概只有十个段

子，所以又名叫：“馬浪蕩十棄行”后来通过艺人們不断的創作，出現了数以百計的新段子，可惜并无脚本流傳。

“卖橄欖”原是苏剧后灘“四卖一垃圾”中的一出，是屬於民間花鼓戏类型的节目。后来艺人們为适应演出需要，仿照“卖橄欖”編出許多新的段子，才发展成为滑稽說、唱类型的节目。艺人們随編随演，不断出現新段子，和“馬浪蕩”一样，名称不改，都叫：“卖橄欖”。也无脚本流傳。

因为“馬浪蕩”和“卖橄欖”段子多，所以有“卖不完橄欖，棄不尽行”之說。

苏灘化粧表演（即化粧苏灘）出現后，“卖橄欖”和“馬浪蕩”也常作为化粧表演的节目出現在舞台上，最后“馬浪蕩”也出現了有三、五人出場的剧目了。

“馬浪蕩”和“卖橄欖”对后来的独脚戏乃至文明戏和滑稽戏都有一定的影响。

这里編印的“馬浪蕩”是从我室記錄苏灘老艺人华和笙、朱筱峯、薛浩如口述的各段子中挑选出八十五段，分裝三册（第五、六、七集）。“馬浪蕩”也和卖橄欖一样，每一段子都用相同的起首和尾声唱詞。

为了尽可能保持原来面貌，在內容上未加改动，只作了些文字上的校訂工作。

苏州市戏曲研究室

1961年7月

苏剧后滩第五集(馬浪蕩)目录

露馬脚	(1)
唱灘簧	(5)
唱昆班戏	(10)
做宣卷	(16)
做小堂名	(22)
做豆腐店	(28)
开荐头店	(33)
做旧貨	(39)
做典当	(46)
押头店做伙計	(54)
卖担头	(60)
卖花	(64)
卖稻柴	(69)
做廚师	(76)
做轎夫	(84)
堂子里做相帮	(88)
倒馬桶	(91)
卖橙甌	(96)
做挂号	(102)
做仆孩	(107)
做佣人	(113)
販牛	(116)

学皮匠·····	(119)	✓
卖糖·····	(127)	✓
卖糖元宝·····	(133)	✓
测字(一)·····	(139)	✓
测字(二)·····	(149)	✓
画肖照·····	(158)	✓
吃白食·····	(164)	✓
吃碰饭·····	(168)	✓

露馬脚

人物：馬浪蕩（丑）

大 姐（旦）

大 姐（上唱）東方日出照紗窗，
緩步輕移到中堂。

馬浪蕩（上）阿姐！

大 姐 嚟！（接唱）浪蕩啊！
係一向耽擱何方地？
——从头說清爽。

馬浪蕩 阿姐，長遠勿見哉！

大 姐 姑歇係勒浪做啥？

馬浪蕩 做本行嘅！

大 姐 做啥本行？

馬浪蕩 唱灘簧。

大 姐 啊咦！哪哼馬浪蕩唱灘簧介？

馬浪蕩 啊咦！唱灘簧末就是馬浪蕩，馬浪蕩末就是唱灘簧
嘅。

大 姐 我到今朝剛剛才明白來！

馬浪蕩 格就叫做“露馬脚”嘅。

大 姐 哪哼“露馬脚”介？

馬浪蕩 有出典骨。

大 姐 啥出典呢？

馬浪蕩 有一个朋友，因为丈姆娘生病哉，俚係去望望丈姆

娘格毛病……

大 姐 格是蛮好骨。

馬浪蕩 倒說佢係一家人家三个人，从前做格行业大家才瞞起格，姑歇因为看毛病，才露仔馬脚哉呀！

大 姐 哪哼三个人介？

馬浪蕩 一个女婿，一个丈姆，一个是阿舅噠。

大 姐 女婿从前做啥生意格？

馬浪蕩 女婿是做道士先生格。

大 姐 丈姆娘以前做啥呢？

馬浪蕩 丈姆是做师娘格。

大 姐 阿是看香头格？

馬浪蕩 蛮对，蛮对，帶道搭人家关亡格。

大 姐 还有个介？

馬浪蕩 还有个是阿舅噠。

大 姐 做啥生意格？

馬浪蕩 从前是唱本灘，做花旦格。

大 姐 哪哼才露出馬脚来呢？

馬浪蕩 格日仔道士先生着好仔衣裳，要出去做生意哉。

大 姐 蛮好噠！

馬浪蕩 佢係家小对佢說：“佢出去未帶道去看看佢娘，佢勒浪生病”。

大 姐 道士先生哪哼說？

馬浪蕩 說：“好格，好格，我去弯弯末哉”！佢係手里拿仔把扇子，走到佢篤丈姆娘屋里、勒丈姆娘床門前一立……

大 姐 做啥？

馬浪蕩 佢係拿仔把扇子，摆出一个唱喏架子。

大 姐 咦！做啥介？
馬浪蕩 咦！露出来哉噠。
大 姐 露出啥来哉介？
馬浪蕩 听噻，俚說哉噠！
大 姐 說啥介？
馬浪蕩 別人家探病末，总归是說丈姆娘，係是几时起病格？
大 姐 总是什梗骨！
馬浪蕩 勿对格！
大 姐 哪介？
馬浪蕩 俚係开口出来，賽过勒浪做道場。
大 姐 哪哼洛？
馬浪蕩 俚係朗起仔道士調头，手里捧仔把扇子，倒說：“丈姆阿母，啥格毛病，几时起病，阿曾請过郎中先生？係拿病中情形，說撥我听听”。暨家眷等，噉噉起噉起噉起！
大 姐 丈姆娘听见仔哪哼？
馬浪蕩 丈姆娘一听末撥俚引起仔牙鉗哉，俚要露馬脚哉呀！
大 姐 哪哼样式？
馬浪蕩 丈姆娘坐起来，靠勒床浪，头浪扎仔一块布，兩只眼睛馬上白洋洋，一面打噉……
大 姐 做啥介？
馬浪蕩 看香头着惯骨，俚係拍拍自家胸脯，打冷噉开场。
大 姐 算啥介？
馬浪蕩 算係佬上身哉噠，（关亡調）“叫声女婿大官人”！
大 姐 啥，講閑話有調头格介？
馬浪蕩 关亡調头噠，（浦东白念）“实我毛病，十四得病，月半上床，十六就請郎中先生，話洛勿要紧”。难末

噎、噎、噎，打噎哉。

大 姐 什梗一来哪哼呢？

馬浪蕩 难末僵哉！

大 姐 哪啦？

馬浪蕩 女婿末立勒床門前，搭仔个道士架子，勿能劲哉。

大 姐 丈姆介？

馬浪蕩 丈姆末戳勒篤床浪，兩只眼睛白洋洋，咀里向只管打冷噎。

大 姐 难末哪哼？

馬浪蕩 难末叫僵。

大 姐 格末弄勿落哉喊？

馬浪蕩 还好，齐巧唱本灘个阿舅轉来哉，到房間里向一看末曉得弄勿落哉，讓我來喊声但姐夫，解开仔吧！

大 姐 哪哼喊法格？阿是：“姐夫，到客堂間里去坐歇”？

馬浪蕩 勿对格，但係是唱本灘，唱花旦格洛，有身段格。走起路来，娆勒娆，娆勒娆，（动作）繞到床門前一立，兩只手指头朝鬢脚浪向一掠，一只手对仔姐夫肩胛浪向一搭，咀里向末唱起本灘調头：“喔唷！我叫声儂亲姐夫，儂到外头客堂里向去請坐坐呀”！

大 姐 啊喇！匣露仔馬脚哉？

馬浪蕩 阿是？做啥生意，坑（藏）才坑勿搨格，三个人才露仔馬脚完結。

大 姐 格末进去吧！

（唱尾声）香閨綉閣无人在，

倆人双双进香房。

——完——

（华和笙口述）

唱 灘 簧

人物：馬浪蕩（丑）

大 姐（旦）

大 姐（上唱）東方日出照紗窗，
緩步輕移到中堂。

馬浪蕩（上）阿姐！

大 姐 噯！（接唱）浪蕩吓！
係一向耽擱何方地？
一一从头說清爽。

馬浪蕩 阿姐，長遠勿見哉！

大 姐 姑歇係勒浪啥場化？

馬浪蕩 姑歇我勒浪唱灘簧。

大 姐 啥，係灘簧匣會唱格？

馬浪蕩 會唱骨！

大 姐 係唱啥格灘簧？

馬浪蕩 各地方人唱各地方灘簧，我是蘇州人末唱唱“蘇灘”
噠。

大 姐 常州人啲？

馬浪蕩 常州人末唱“常灘”。

大 姐 無錫人呢？

馬浪蕩 無錫人唱“錫灘”。

大 姐 寧波人呢？

馬浪蕩 寧波人唱“寧灘”。

大 姐 格末紹兴人介?

馬浪蕩 紹兴人末唱唱僚格“賤胎”!

大 姐 要末僚是賤胎!

馬浪蕩 还有火头火趂叫“火灘”。

大 姐 阿是吃格火腿?

馬浪蕩 僚末独想吃!

大 姐 格末啥叫火腿?

馬浪蕩 勿是火腿，唱起来穷凶极惡格末叫做“火灘”。

大 姐 江北人呐?

馬浪蕩 江北人叫“江灘”。

大 姐 喔!阿是生风爐格杠炭介?

馬浪蕩 勿对格，叫“江灘”；同样格灘簧到仔侬苏州人咀里，唱起来就好听哉。

大 姐 勿相信!

馬浪蕩 僚勿相信末我来唱撥僚听睹!

大 姐 僚唱唱看噯!

馬浪蕩 譬如侬苏州人唱一只蔣老五，搭別場化人就勿同，唱起来来得个嗲。

大 姐 格末僚唱唱看噯!

馬浪蕩 (唱蔣老五調)想起从前泪紛紛，

蔣老五从小苦零丁……

大 姐 哪哼洛介?

馬浪蕩 (接唱)九岁辰光亲爷娘死，

举目无亲去靠啥人?

大 姐 喔唷!倒是实头嗲格!

馬浪蕩 无錫人唱起来就勿同哉!

大 姐 哪哼勿同介?

馬浪蕩 僚听噃：
(唱前調，无錫腔)僚侬想起从前僚侬泪紛紛，
僚侬蔣老五从小僚侬苦零丁……
唱起来独是爛泥哉。

大 姐 倒是勿好听格！
馬浪蕩 格是江北人唱起来还要难听来！

大 姐 哪哼啦？

馬浪蕩 僚听噃：
(唱前調，苏北腔)想起辣夠从前辣夠泪紛紛……

大 姐 啥格辣夠、辣夠介？

馬浪蕩 就是伊个、伊个喊，格是唱下去还要好白相来！

大 姐 哪哼洛？

馬浪蕩 听我唱噃：
(唱前調)我小五子辣夠从小辣夠苦零丁……

大 姐 啥小五子介？要唱蔣老五骨。

馬浪蕩 俚篤是叫小五子骨，阿是难听格？

大 姐 倒是勿好听格！

馬浪蕩 格是山东人唱起来人匣要吓得煞格！

大 姐 僚有心唱唱看！

馬浪蕩 (唱前調，山东腔)俺想起那个从前泪紛紛，
俺蔣老五从小那个苦零丁，
九岁时就把爹爹、媽媽死，
俺举目无亲去靠什么人？

大 姐 喔唷！啥格个腔調硬蹦蹦格介？

馬浪蕩 阿是吓人格？就是无錫人唱起“无錫景”来匣嘸撥
苏州人唱起来好听。

大 姐 啥，无錫人唱“无錫景”，匣会勿如苏州人好听介？

馬浪蕩 纏吵噠，我来唱撥俵听啫！

大 姐 好骨！

馬浪蕩 (唱无錫景調，无錫腔) 俵佢有--(讀“謁”音) 独(段)
情啫，唱只无(讀“浮”音) 錫景……

大 姐 勿好听噠，格末苏州人唱起来呢？

馬浪蕩 苏州人唱起来就好听哉！

大 姐 我勿相信！

馬浪蕩 格末俵听啫：

(唱前調，苏州腔) 我有一段情呀，

唱只无錫景……

大 姐 噯，倒是好听格！

馬浪蕩 格洛唱灘簧末讓还佢苏州人哉。喔！我想起起来哉
……

大 姐 想起点啥？

馬浪蕩 有一日夜头，我走过一家人家，听见有人勒浪哭
……

大 姐 格关俵啥事介？

馬浪蕩 啫！就是哭起来匣是佢苏州人好听；別場化人哭起
来，声音直崩崩格。

大 姐 我勿相信！

馬浪蕩 格末俵听我来哭啫：

(苏北白) “啊呀，我的乖乖！……”

大 姐 勿好听，苏州人哪哼哭法？

馬浪蕩 佢苏州人哭起来，才要朗起仔調头勒哭格，来得格
好听，比如有一家人家，娘死哉，囡国哭起来，格
是亲热得来！

大 姐 格末自然亲热骨，俵学学看？

馬浪蕩 (苏州哭調) “啊呀，亲娘啊，我活勿落哉呀，跟侬一淘去仔吧！……”

大 姐 倒是蛮好听，蛮亲热格！

馬浪蕩 格辰光正当勒浪安甯，俚侬一头哭，一头拿头去撞棺材……

大 姐 喔，是伤心格。

馬浪蕩 棺材木头是毛骨，俚侬勒浪拿头撞，别人末勒旁边拉，俚侬格头发攢到仔棺材口浪，上头拿棺材盖盖下来，齐巧扎牢住，俚侬咀里末哭，要跟娘一淘去，觉着头发攢棺材扎牢哉末，当仔死人拿俚拉牢仔，真格要搭俚一淘去哉，格一来拿俚吓煞哉！

大 姐 格末后来哪哼介？

馬浪蕩 叫起救命来哉呀！

大 姐 格末刚正要跟娘一淘去骨？

馬浪蕩 本来才是假格噠，人匣死哉，还去哭俚点啥？姑歇我灘簧勿唱哉，又要换行业哉！

大 姐 格末进去吧！

(唱尾声)

香閨綉閣无人，

俩人双双进香房。

——完——

(薛浩如口述)

唱昆班戏

人物：馬浪蕩（丑）

大 姐（旦）

大 姐（上唱）东方日出照紗窗，
緩步輕移到中堂。

馬浪蕩（上）阿姐！

大 姐 噯！（接唱）浪蕩啊！
僚一向耽擱何方地？
——从头說清爽。

馬浪蕩 阿姐，長远勿見哉！

大 姐 姑歇僚勒浪做啥？

馬浪蕩 吃开口飯，勒浪唱戏。

大 姐 阿是京班戏？

馬浪蕩 挨勿着。

大 姐 格末唱啥格戏？

馬浪蕩 唱昆班戏。

大 姐 僚外行喊？

馬浪蕩 拜先生骨。

大 姐 唱啥格脚色？

馬浪蕩 唱小花面。

大 姐 先生是啥人？

馬浪蕩 佢先生是有名气格，叫“小脚籃”。俚对我說：“僚唱小花面，先要唱搭头，勿能唱正場”。所以說、教

仔我一出單刀赴会里向格周仓。

大 姐 咦！周仓哪哼是小花面介？

馬浪蕩 是格噠，昆戏里向周仓是小花面粉格。

大 姐 还教啥哦？

馬浪蕩 还教仔一出勿开口戏。

大 姐 哪哼有啥勿开口脚色格？

馬浪蕩 咦！景阳崗武松打虎，只老虎阿是勿开口格？

大 姐 喔唷！老虎才要做格。

馬浪蕩 是噠，学仔長远，倒学会哉。格日子先生对我說：

“今朝係出台哉，当点心呀”！我一听，蛮开心，老早就到后台，佢先生搭我开仔个小花面。阿姐，我是个心急人，一早就拿面孔开好，到大衣箱浪拿衣裳着好，帽子戴好，靴子穿好，一看辰光还早来，我是欢喜睏觉（吳語念“告”音）格，就到大衣箱浪打个瞌眊，洛里曉得辰光快煞格，一歇歇工夫，外头敲起鑼鼓开場哉，管事喊：“周仓上場哉，周仓上場哉”！

大 姐 格末係快点上場啫？

馬浪蕩 我睏得糊里糊塗，好得头浪向、身浪向、脚浪向才着好勒里。

大 姐 格末手里阿要拿点啥？

馬浪蕩 要拿格噠，拿把天刀。我就过去什梗一拿（做手势介），匣檐曉得拿个啥物事？就此出場哉，走到台当中，有四句定場白格。

大 姐 哪哼四句？

馬浪蕩 听好，我說：“志气凌云貫九霄，周仓在家显英豪；父王独赴單刀会，全仗青龙偃月……”